

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallarniut

Suliffeerunnermi ikiorsiissutit pillugit inatsisartut peqqussutaat atuuttup 1. juli 2006-imi atuutsinneqalersup siunnersuutip annertunersaatigut assigaa. Siunnersuutip suliarineqarneranut peqquataavoq suliffeerunnermi ikiorsiissutit pillugit inatsisartut peqqussutaani atuuttumi tulluannigitsunik paasinnittoqarsimammat. Suliffissaqartitsiniarnermi inatsisit ukiuni takkuttussanik nutarterneqarnissaat Naalakkersuisut naatsorsuutigigaluarlugu siunnersuut saqqummiunneqarpoq, Inatsisartut peqqussutaanni maanna atuuttumi tulluannigitsut iliarsineqarnissaat pisariaqartinneqartutut isumaqarfigineqarmata.

Inatsimmi namminerme aalajangersakkat inatsisip kalaallisuuata aamma danskisuuata akornanni tulluarsaanissaq sunnersuummi qulakkeerinnittoqassaaq, suliffeerunnermi ikiorsiissutit naatsorsorneqartarnerisa tunniunneqartarnerisalu tungaasigut kukkusumik nutserineqarsimammat peqquutigalugu. Tamakku saniatigut siunnersuut suliffeerussimasunut imaluunniit angerlartinneqarsimasunut periarfissiissaaq suliffeerunnermi ikiorsiissutit katersorneqarsimasut pissarsiarinissaannik pissusaaffeqarnerminnik annaasaqanngikkaluarlutik suliffiit sivikitsumik sivilissuseqartut innersuunneqartut suliffigilersinnaammatigik. Tamakku saniatigut, sulisut angerlartinneqartut eqqarsaatigalugit taamaallaat sulisut angerlartinneqarsimasut kisimik pineqarnersut siunnersuummi aamma erseqqissaatigineqarpoq. Tamanna inatsimmi atuuttumi paasiuminaassimavoq, maannili erseqqissaatigineqarluni.

Siunnersuutip aqqissuusseqqinnissat takkuttussat, tassa imminut pilersornissamut kiisalu suliffeqarnermi peqataanissamut kajumilersitsinissamik siunertaqartoq tunngavilersorpaa.

Siunnersuummi tunngavigineqarpoq suliffeerussimasutut nalunaarsorneqarsimasut, suliffissaqartitsiniarnermi sulilersinnaasutut piareersimavittut quakkeerinniffigineqassammata nammineq pisuussutigiginagu suliffeerunnerup nalaani aningaasaqarnikkut qulakkeerinniffigineqarnissaat. Siunnersuummi napparsimasut aamma ilanngunneqarput.

Siunnersuummi kissaatigineqarpoq inuit nammineq pisuussutigiginagu suliffeerussimasut kiisalu napparsimasut aningaasatigut pissarsisinnaanissaannik qulakkeerinniffigineqarnissaat.

Suliffissaqartitsiniarnermi aaqqiissutip nutaap suliffissaaleqisut, sulinermik inuussutissarsiuteqarlutik akissarsiorsinnaassuseqartut, suliffissaqartitsiniarnermilu suliffeqalernissaminut piareersimavissortut, suliffissaaleqisunit suliffissaaleqinerup saniatigut ajornartorsiuteqartuusut immikkoortinneqarnissaat.

Suliffeerunnermi ikiorsiissutit suliffissaqartitsiniarnermi politikkimik eqeersimaartumik tapertaassaaq, suliffeqarfinnik ingerlatsisut sulisartunik piginnaasalinnik noqqaassuteqarnerat iluaquserniarneqassalluni, piffissat suliffissaaruffiusut siunertaqartumik piginnaangorsaanernut iluaqutaasumik atorluarnerisigut.

Suliffeerunnermi ikiorsiissutit taamattaaq suliffissaaleqisut siunissami suliffissaqartitsiniarnermut aalajangersimanerusumik atuumassueqalernissaannut qulaakkeerinneqataassapput, piffissami suliffissaaleqinerup nalaani piffissani taakkunani ilatsiinnartumik pilersorneqarnermit eqeersimaartumik ilinniaqqinnissamut piginnaangorsaanermullu suliniutini peqataasarnermikkut.

Tamakku saniatigut suliffeerunnermi ikiorsiissutit suliffissaaleqisup sammisassaqartitsiniarnermi peqataalernissaminut imaluunniit suliffissaqartitsiniarnermi pilersaarutitut peqataalernissaanut sinaakkutissanik tulluurtunik pilersitsissasut.

Suliffeerunnermi ikiorsiissutit sulisartunut ilimanaatilinnut sulinermik inuussutissarsiornikkut akissarsiorsinnaasunut, suliffissaqartitsiniarnermullu attuumassuteqareertunut aningaasaqarnikkut iluaqusiinertut tunniunneqartarput. Suliffeerunnermi ikiorsiissutit suliffissaaleqisup inoqutaasa isertitaasa katinneri apeqqutaatinnagit tunniunneqartarput, pineqartup suliffissaqartitsiniarnermut atuumassuteqarnera tunngavigalugu tunniunneqartarmata.

Suliffeerunnermi ikiorsiissutit tunngavinnik pingaarnernik arlalinnik aallaaveqarput. Siullertut imminut pilersornissamut kaammattuineq qulakkeerneqassaaq, ima paasineqassalluni, sulineq kiisalu suliffissaqartitsiniarnermut attuumassuteqarneq akilersinnaassaaq. Taamattaaq suliffissaaleqisut pillugit allaffissornikkut aqutsineq toqqaasarnerlu sullissivimmi ataasiinnarmi isumagineqartassaaq, sulilersinnaaneq pillugu aalajangersakkat aallaavigalugit suliffissaaleqisoq ilumut suliffissaqartitsiniarnermut sulilersinnaanersoq kiisalu inuussutissarsiutigalugu akissarsiorsinnaanersoq aalajangerneqarsinnaassammat. Suliffissaaleqisut piumasaqaatinik tamakkuninnga eqquutsitsisut taamaallaat suliffissaaleqisutut nalunaarsorneqarlutillu nalunaarutigineqartassapput.

Tamakku saniatigut suliffissaaleqisunut immikkut iliuusissatut pilersaarummik siunertaqartumik sularinninnissamut pisinnaatitaaneq pisussaaffeqarnerlu qulakkeerneqassapput, pisariaqartitsineq malillugu nutarterneqartartussamik, piffissallu

suliffeqannginnerup nalaani suliffimmik tulluartumik, sammisassaqtitsinermik aamma/imaluunniit piginnaanngorsaanikkut suliniutinut innersuunneqartitsineqartassalluni. Tamakku saniatigut suliffeerunnermi ikiorsiissutit suliffissaqartitsiniarnermi sulinermik inuussutissarsiuteqartukkaat assigiinngitsut akornanni naligiissitaanermik qulakkeerinnissapput.

Siunnersuutip suliffeerunnermi ikiorsiissutit pillugit inatsisartut peqqussutaat nr. 5, 1. juni 2006-imeersoq taarserpaa.

2. Siunnersuummi immikkoortut pingaarnertit

Suliffeerunnermi ikiorsiissutit pillugit siunnersuutip matuma nammineq pisuussutiginaq suliffeeruttut, angerlartitaasut kiisalu napparsimasut sulinermi iluanaarutissaraluannik annaasaqarneranni aningaasatigut taarsiiffigineqarnissaasa qulakkeernissaat siunertaraa.

Suliffeerunnermi ikiorsiissutit sulinermik inuussutissarsiuteqartunut sapaatit akunnerini kingullerni 13-imi sulinermik inuussutissarsiuteqartutut sulisimasunut piffissamilu tassani ikinnerpaamik nalunaaquttap akunnerini 182-imi suliffeqarsimasunut tunniunneqartarput.

Suliffeerussimasut ataasiakkaat kommunip ingerlatsivianut saaffiginnittut toqqarneqartarnerat piginnaasanillu paasiniaaneq pillugit kommunimi pisassapput. Kommunalbestyrelsi ilitsersorneqarnissaminik ujartuisoq peqatigalugu immikkut iliuusissatut pilersaarummik suliarinnissaaq. Tassangaanniit suliffeerussimasut siunertaqartumik isumaginninnermi iliuuseqarfissanut ingerlateqqinneqassapput, soorlu pisortat ikiorsiissutaannut, sulisinnaajunnaarneriuteqarnissamut imaluunniit suliffissaqartitsiniarnermi iliuusissanut, tassaasinnaallutik suliffeerunnermi ikiorsiissutit, piginnaanngorsarneqarnermut, sammisassaqtitsiniarnermut imaluunniit suliffissaqartitsiniarnermi iliuusissanut.

Inuit suliffeqarlutik inuussutissarsiorsinnaasut, suliffissaqartitsiniarermilu sulilernissaminnut piareersimavissut kommunimi suliffeerussimasutut nalunaarsorneqassapput, suliffeerussimasulli allat suliffissaqartitsiniarnermi sulilernissaminnut piareersimasutut nalunaarsorneqassangillat. Taamaaliornikkut inuit sulisartutut ilaavissortut amerlassusii piviusorpalaarnerusumik anguneqassapput.

Inuit suliffeqarfimmit isertitaqanngitsut, tunisassiornermik unitsitsineq pequtigalugu sulisut soraarsivinngikkaluarlugit angerlartittariaqarsimagaat, suliffeerunnermi ikiorsiissutinik pissarsinissaminnut periarfissaqarput. Ikiorsiissutilli tunniunnissaannut tungaviusaaq, piffissami suliffeqannginnerup nalaani suliffimmik allami innersuunneqarnermi sulilerialinnaassasut imaluunniit piginnaanngorsaalluni suliniutinut peqataalersinnaassasut. Tulluartaunngitsutut paasineqarsimavoq, suliffeerunnermi ikiorsiissutinik pissarsisartut piffissami sivikitsumi paarlattaasussatut neqeroorummik

akuersaarsimasut suliffeerunnermi ikiorsiissutinik pissarsisinnaanerminnik annaasaqartarsimasut. Tamanna ajornartorsiutaavoq, suliffimmi taamaattuukkajuttarput, assersuutigalugulu sapertunik paaqqinnittarfinni paarlattaasussanik pissarsisinnaannginneq inuiaqatigiit ajornartorsiutigilersarpaat. Taamaammat siunnersuummi aalajangersakkamik ilanngussisoqarsimavoq, suliffeerunnermi ikiorsiissutinik pissarsisartut piffissap suliiffeerunnermi ikiorsiissutinik pissarsisarnerup nalaani ulluni ataasiakkaani akissarsiaqarluni isertitaqarsimagaanni suliffeerunnermi ikiorsiissutinik pissarsisinnaaneq annaasaqaatigineqassanngitsoq. Aalajangersakkap pisortat ikiorsiissutaat pillugu inatsisartut peqqussutaanni nr. 15, 20 november 2006-imeersumi aalajangersagaq assigaa.

Angerlartinneqartut tassaapput sulisartut suli atorfeqartinneqartut, taamaattorli assersuutigalugu iluarsaassinerit annikitsut peqqutigalugit imaluunniit tunisassiornermi atortorissaarutinik aserfallatsaaliinerit peqqutigalugit piffissami sivikitsumi angerlartinneqarallarsimasut.

Suliffeerunnermi ikiorsiissutinik tunniussisarneq unitsinneqarsinnaavoq, suliffeerussimasup imaluunniit angerlartinneqarsimasup suliffik innersuunneqarsimasoq suliffigilissallugu naaggaarsimappat, suliffimmut innersuunneqarsimasunut takkutinnngitsoorpat, sammisassaqaartitsiniarnermi, suliffissaqaartitsiniarnermi imaluunniit piginnaanngorsaanermi neqerorummot innersuunneqarsimasumut takkutinnngippat, taamaalillunilu suliffissaqaartitsiniarnermi sulileriaannaasutut naatsorsuutigineqarunnaartutut isigineqalissalluni.

Suliffeerussimasoq imaluunniit angerlartitaasimasoq suliffissaqaartitsiniarnermi sulileriaannaanngitsoq, peqqussut manna malillugu sapaatit akunnerini sisamani (4) pillaatitut pisartagaqarnissaminut mattussaasinnaavoq. Suliffeerussimasoq imaluunniit angerlartitaasimasoq sapaatit akunneri sisamat (4) qaangiunnerini suliffissaqaartitsiniarnermi sulilernissaminut suli piareersimannngippat, pineqartoq suliffeerunnermi ikiorsiissutinik pissarsisinnaatitaanngitsutut isigineqassaaq.

3. Aningaasarsiornikkut allaffissornikkullu pisortanut sunniutissat

Siunnersuut aningaasarsiornikkut allaffissornikkullu pisortanut sunniuteqartussatut nalilerneqanngilaq.

4. Aningaasarsiornikkut allaffissornikkullu suliffeqarfinnut sunniutissat

Siunnersuut aningaasarsiornikkut allaffissornikkullu suliffeqarfinnut sunniuteqartussatut nalilerneqanngilaq.

5. Avatangiisinut, pinngortitamut inuillu peqqissusiannut sunniutissat

Siunnersuut avatangiisinut, pinngortitamut imaluunniit inuit peqqissusiannut sunniuteqartussaangilaq.

6. Innuttaasunut sunniutissat

Siunnersuut innuttaasunut periarfissiisaaq aningaasaqarnikkut qulakkeerinniffigineqarnisaaq annaangikkaluarlugu sivikitsumik sulisarnissaannut periarfissiisaaq, soorlu suliffeerunnermi ikiorsiissutit taamaattut.

7. Sunniutissat pingaarutillit allat

Siunnersuut Naalagaaffeqatigiinnermi pissutsinut sunniuteqassangilaq namminersornermullu annertusaatit sunniuteqartussaasanani.

8. Pisortanik kattuffinnillu/suliffeqarfinnillu tusarniaaneq

Siunnersuut piffissami 5.december 2013-imiit 6. Januar 2014-imut makkununga tusarniaassutigineqarsimavoq: Siulittaasup Naalakkersuisoqarfia, Aningaasaqarnermut, Nunamullu Namminermt Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilaqutariissutsimut Inatsisinullu tunngasunut Naalakkersuisoqarfik, Kommuneqarfik Sermersooq, Qeqqata kommunia, Qaasuitsup kommune, Kommune Kujalleq, KANUKOKA, , SIK, Sulisitsisut,GA, NUSUKA, Royal Greenland, Halibut, Deloitte, Polarseafood, Artic Prime Production og Arctic Green Food.

Tamatuma saniatigut siunnersuut Namminersorlutik Oqartussat nittartakkut tusarniaaffiani innuttaasunut tamanut tusarniaassutigineqarsimavoq.

Tusarniaanermi makkunangaanniit akissutit tiguneqarsimapput: Ilaqutariissutsimut Inatsisinullu tunngasunut Naalakkersuisoqarfik, Aningaasaqarnermut, nunamullu Namminermt Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, KANUKOKA, Kommune Kujalleq, Kommuneqarfik Sermersooq, Sulisitsisut,GA, SIK, Piareersarfik Sisimiut, aamma IMAK.

Tulliuttuni tusarniaanermi akissutit tusarniaanerullu nalaani siunnersuummut allannguutissatut siunnersuutit takkussuussimasut sammineqassapput. Malugeqquneqassaaq tusariaanermi akissutit, uingasunik allassimasunik issuarneqartut, pingaaruteqarnerisa nalilersoreereri tunngavigalugit taamaallaat pingaarnersiorlugit issuarneqarsimammata. Tusarniaanermi akissutit tamarmiutillugit Inatsisartuni ataatsimiititaliami suliarinnittussamut ilanngullugit nassiunneqarsimapput.

Ilaqutariissutsimut Inatsisinullu tunngasunut Naalakkersuisoqarfiup uparuarpaap napparsimatilluni suliffissaarunnermi ikiorsiissitunik qanoq sivisutigisumik pisartagaqarsinnaaneq ersarluttoq.

Inatsimmi atuuttumi § 9. imm. 2-ni allaqqavoq suliffissaarunnermi ikiorsiisstinik katillugit sap. akunneri 13-t pissarsisoqarsinnaasoq. Tamanna aamma napparsimanermi atuuppoq. Naak tamanna nutaami § 10. imm. 5-imi ikkunneqareeraluartoq takuneqarsinnaavoq suliffissaarunnermi ikiorsiissutit katillugit sap. akunnerini 13-imi ikiorsiissutigineqarsinnaapput.

Ilaqutariissutsimut Inatsisinullu tunngasunut Naalackersuisoqarfiup oqaatigaa pisortat suliffeqarfiini sulisut kiisalu suliffinni nammonersortuni sulisut nappismanerminni assigiinngitsorujussuarmik pineqartartut. Suliffeqarfinni nanninersortuni sulisut soorlu assersuutigalugu nappaassuarmik kræftimik nappaateqalersimasut taammaattumillu napparsimanermik/katsorsartinnermik sivisuumik atugaqartartut allatut ajornartumik pisortat ikiorssisutaannut nalinginnaasunut ilanngutipallattariaqalersartut, tassa sulinerminni isumaqatigiissutit atuuttut tunngavigalugit napparsimanermi nalaani aningaasarsiaqartinneqanngikkunik.

Pissutsit Ilaqutariissutsimut Inatsisinullu tunngasunut Naalackersuisoqarfiup uparuagai tassaapput suliffeqarnermi illuatungariit isumaqatigiinniarnermi isumaqatigiinnitigisartagaat isumaqatigiissutitigullu aalajangersarneqartartut. Pissutsit taakkua Suliffissaarunnermi Ikiorssiillutit pillugit inatsimmut attuumassuteqanngitsut.

Ilaqutariissutsimut Inatsisinullu tunngasunut Naalackersuisoqarfiup oqaatigaa, oqaatigisamut assersuut § 1-imi suliffimmit soraarnermut tunngavigisaq ”naammaginar-tumik peqquitiqarluni” assersuutigissallugu tulluurtuunngilaq, tassa inuk qitornaminik annertuumik nappaateqartumik paaqqinninniarluni suliffimminik soraartariaqartup suliartoqquneqarnissamullu piareersimangitsoq suliffissarunnermi ikiorsiissutinik pissarsinissamut pisinnaatitaaffeqanngitsoq matumani pineqarmat.

Assersuut nutaaq ikkunneqarpoq.

Aningaasaqarnermut, Nunamullu Namminermut Naalackersuisoqarfiup oqaatigaa §7-imut oqaaseqaatini pisortat ikiorsiissutaasa allatorsimaffiini pisortanit ikiorsiissutit nalinginnaasut ilanngunneqartariaqartut.

Taanna oqaaseqaatinut ilanngunneqarpoq.

Aningaasaqarnermut, Nunamullu Namminermut Naalackersuisoqarfiup uparuarpaa tulluussakkanut, matchgruppe 2 aamma matchgruppe 3 aallavigalugit taakkununga inissinneqartut suliartoqquneqarnissaminnut piareersimasutut, taamaattumillu suliffissaarunnermi ikiorsiissutinik pisartussatut nassuiarneqarsimanerat, aallaavigalugu assortuussutigineqarsinnaammat.

Suliffissaaleqisoq tullussakkamut matchgruppe 1-imut innissinneqartoq, piffissami sivisunerusumi napparsimalernermik kinguneqartumik napparsimalersaq matchgruppe 3-mut inissinneqassaaq, taamaalillunilu suliffissaarunnermi ikiorsiissutinik pisinnatitaalerluni, tamannalu inatsimmi § 10, imm. 1-imi takuneqarsinnaavoq.

Aningaasaqarnermut, Nunamullu Namminermut Naalackersuisoqarfiup oqaatigaa tulluussakkanut, matchgruppenut agguariaaseq inatsimmut ilanngunneqartariaqartoq. Tulluussakkani, matchgruppeni taakkunani ikiorsiissutigineqartartut qanoq annertutigisut tunniunneqartassanersut. ” Tulluussakkanut, matchgruppenut agguariaatsip eqqunneqarnerata innuuttasut pisartagaasigut allannqortitsineq kingunerisinnaammagu tamanna innuttaasut aningaasatigut inissisimanerata allannqornerata kingunerisaanik, kiisalu pisortanut kinguneqarnissaat pillugu tamanna nalinginnasumik oqwaaseqaatigut ilaatinneqartariaqarpoq”.

Tulluussakkamut matchgruppemut sorlermut inissisimaneq suliffissaaruttut ikiorsiissutinik pisinnaatitaanerme apeqqutaanngilaq, kisiannili sap. akunnerini kingullerni 13-imi nal. akunneri qassit sulisimaneq apeqqutaasarluni. Taamaattumillu tulluussakkamut matchgruppemut allamut nuunnermi isertitatigut allanngineq pineqanngilaq, allannginnermut napparsimanermik pissuteqarnera aallaaviulluni. Taamaattumillu Aningaasaqarnermut, Nunamullu Namminermut Naalackersuisoqarfiup oqaaseqaataa alannguinissamik kinguneqassanngilaq.

Naggataatigut Aningaasaqarnermut, Nunamullu Namminermut Naalackersuisoqarfiup oqaatigaa suliffissaaleqisut iliuusissamut pilersaarusiornertat ersarissuusariaqartoq.

Siunnersuummi § 8, imm.2-mi allaqqavoq iliuusissamut pilersaarut suliarineqassooq kiisalu § 13, imm. 1-imi allaqqavoq suliffissaaruttoq iliuusissamut pilersaarusiounneqarnissamut itigartitsissappat kinguneqartinneqarsinnaasoq.

Kommune Kujalleq-up oqaatigaa suliffissaaruttut taartaanermik suliaqarnertik pissutigalugu suliffissaarunnermi iliorsiissutinik pisartakkaminnik annaasaqariataarsinnaanerata pissusissamisuunnginnera siusinnerusukkulli uparuaassutigereernikuullugu, maannali tamanna aqqiisuteqarfiginiatlugu siunnersuutiginnera Kommune Kujalleq-mit naammagisimaarneqarpoq.

Tamatuma kingornatigut Kommune Kujalleq imaattumik oqaaseqaateqarpoq: ”Uvagut isumarput naapertorlugu taamaaliornikkut sulisitsisut atorfinnut inuttassarsiukkanut taartaagallartunik pissarssinissaat ajornannginnerulissaaq, kiisalu suliffissaaruttut taartaagallartut sulinissartik nangaassutigiunnaassaaq, taamaaliornikkuttaarlumi ataavartumik atorfinitsitaanissaminnut periarfissarissaarnerulissapput.

Tamatuma saniatigut Kommune Kujalleq-mit Kommunalbestyrelsip siunnersuutigaa suliffissaaruttoq angerlartinneqarsimasorluunniit suleqatigalugu – pineqartoq iliuusissamut pilersaarusiutissagaa inatsimmi ersarissumik allaqqassasoq, tamanna pillugu inatsimmi allami allaqqasoq naapertorlugu”.

Kommuneqarfik Sermersooq-p aallaqqaasiutigalugu oqaatigaa inatsimmi ataasiakktigut naleqqusaanermut taarsiullu suliffissaqartitsiniarnermut inatsit tamarmiusoq nalilersoq-qinneqatatoq takorusunnerullugu. Kommuneqarfik Sermersooq-p pingaartippa inuit sulisartutut imminnut napatinernissaannut kajumissuseqalersinnanissamik annertusaanermik suliaqatoqassasoq, taamaattumillu suliffissaaruttut suliffissaarunnerminni ikiorsiissutinik pisartagaqarnertik annaangikkaluarlugu suliffinni piffissami sivikitsumik suliaqarfiussani taamatullu taartaasutut sulisalernissaa inatsimmik allannguinermut ilanngunneqassasoq kissaatigalugu.

Inuussutissarsiornermut, Aatsitassanut Suliffeqarnermullu Naalackersuisoqarfiup kommuneni ilinniartitsinermik ingerlatsineq sukumiisoq ingerlannikuuvaa, tamatumunngalu atatillugu inatsimmi maanakkut atuuttumi tulluanngitsut assigiinngitsut annertuut takusinnaalersimallugit. Inuussutissarsiornermut, Aatsitassanut Suliffeqarnermullu Naalackersuisoqarfiup inatsissatut siunnersuumm ut allannguutissanik takkuttoqarumaarnissaa naatsorsuutigigaluarpaguluunniit tamanna apeqquataatinnagu inatsimmi maanakkut atuuttumi tulluanngitsut assigiinngitsut annertuut paasineqartut iluarsineqarnissaat pisariaqartutut isigaa.

Iliuusissamik pilersaarusiornermut tunngatillugu Kommuneqarfik Semersooq-p oqaatigaa tamanna pillugu oqaasertaisa ilusinerneqarnerat malillugit paasineqarsaaq iliuusissamik pilersaarusiornissaq pisinnaatitaaffiusoq kisiannili pisussaatitaaffiunani. Suliffissaqanngitsut tamamik iliuusissamik pilersaarusiornissaat pisussaatitaaffiussappat Kommuneqarfik Semersooq-p isumaqatigaa, kiisalu KANUKOKA peqatigalugu isumaqarlutik tamatuma Kommunenu aningaasatigut kinguneqarssanersoq sukumiinerusumik misissortariaqartoq.

Kommuneqarfik Semersooq-p kissaatigaa siunnersuummut oqaaseqaatini ”naammaginar-tumik tunngaveqarluni” suliffimminiit soraarnerput assersuutinik ilanngussisoqassasoq, tassa suliffeqarnermut politikki kiisalu isumaginninnermut politikki avissaaqqatinniarlugit.

Assisuut nutaaq ilanngunneqarpoq.

GA-p aallaqqaasiullugu oqaatigaa eqqarsaatigineqartariaqartoq suliffissuarni sulisut tunisassiassarunner, maskiinat jaoquteqarneri, sila assingusulluunniit pissutigalugit angerlartinneqartut suliffissaarunnermi ikiorsiissutinik pisartagaqartalernissaat, tassa tamanna nunami sullivinnut tunisassiortunut allanuinnaq atortuujunnaarsillugu.

§ 4-mut tunngatillugu siunertarineqarpoq Naalackersuisoqarfiup siunissami qaninnerpaami pilersaarutigimmagu qaqugu sulisunut ullumikkut inatsimmi pineqartut avataani inissisimasunut suliffissaarunnermi ikiorsiissutinik tunisisalernissaq atuutilersinneqassaneseq pillugu illuatungeriinnik attuumassuteqartunik oqaloqateqarlernissaq ingerlatilissallugu. Taamaattumillu Sulisitsisut GA-p oqaaseqaataa tullianik inatsinnik allannguinnissamut ilannguttussatut allanneqarpoq.

§ 9-mut tunngatillugu Sulisitsisut GA-p oqaatigaa suliffissaarunnermi ikiorsiissutinik pisartagaqarnerup sivilissusa ullut suliffiusimasut amerlaqataanik ilaneqartarnissaat ersarissarneqarneqartariaqartoq.

Suliffissaarunnermi ikiorsiissutinik pisartagaqarsinnaanerup sap. akunnerinik 13-inik sivilisnerulernissaqarnissaa siunertarineqarnikuunngilaq, tassami Sulisitsisut GA-p siunnersuutaa taamatut paasinewqartariaqarpoq. Taamaattumillu Sulisitsisut GA-p oqaaseqaataa tunngavigalugu siunnersuummi allannguinnissamik kinguneqanngilaq.

SIK-p oqaatigaa siunnersuummut oqaaseqaatini takuneqarsinnaaseq piffissami siviliksumi suliffissaarukkalartunut suliffissaarunnermi ikiorsiissutinik tunniussaqaarnermut periutsit ullunikkut atuuttutallanngortinneqassasut, tamannali inatsisit oqaasertaani ersarinngitsoq, kiisalu oqaaseqaatini nalinginnaasuni tamanna ersarissarneqarsimanani.

SIK-p oqaatigaa piffissami sivilikinnerusumi suliffissaarutunut suliffissaarunnermi ikiorsiissutinik tunniussinerni kikkut ikiorsiissutinik tunineqassanersut pillugu pitsaavallanngitsunik misilittagaqarlutik. Pingaartumillu inatsisip oqaasertaani § 4, tassaavoq nalornissutaasartoq, tassami tamanna suliffissuarni sulisunuinnaq tunngasuuneseq allanneqarsimanngimat. Aqalajangersakkamut oqaaseqaatit tunngavigalugit suli nunani suliffinnuinnaq tunisaassiortunut tunngatinneqarluni, taamaattorli aalajangersakkamut eqqiaanermik kiffartuussinermillu suliaqartunik ilaneqasimalluni.

SIK oqaatigaa siunnersuummut oqaaseqaatinut nalinginnaasunut tunngatillugu allaqqavoq kikkut suliffissaarunnermi ikiorsiissutinik tunineqartarnissaat nalornissutaanera oqaaseqatigiinnik ”sulisutnut angerlartinneqarerannut tunngatillugu taamaallaat sulisunut angerlartinneqartut pineqartut. Tamanna inatsimmi atuuttumi ersarlussimavoq, kisianni ersarissarneqarpoq”-mik nassuiarneqartoq.

Siunnersuut manna aqutigalugu kikkut suliffissaarunnermi ikiorsiissutinik tunineqassanersut pillugit ersarissarneqarnissaa imaluunniit tamatumani suleriaatsit allanngortinneqarnissaat siunertarineqanngilaq. Oqaaseqaatini nalinginnaasunik matamunnga tunngasumik allaqqasogarnera kukkuneruvoq, taannalu nunguteqarneqareernikuuvoq. Naatsorsuutigineqarpoq apeqqut taanna qaqqinneqaumaartoq, tamatumalu kingunerisaanik inatsisissatut siunnersuum-

mi allanguisoqarumaartoq, kisiannili tamatuma suliarinissaa annertuujusussaammat inatsimik tulluarsaanermi matumani ilaatinneqanngilaq. § 4-mut tunngatillugu oqaaseqaatini Inatsisartut peqqussutaat nr. 5-imi ulloq 1. juni 2006-immerni § 2-mut oqaaseqaatinut tunngatillugu allannguisoqanngilaq.

Sisimiuni Piareersarfiup oqaatigaa pingasunngornermi angerlartitaaneq ajornartorsiutitaqarsinnaasoq, tassami pingasunngornikkut kommune matoqqasarmat.

§ 6, imm. 2-mut oqaaseqaatini allaqqavoq sulisup angerlatinneqartup kommunip allaffia attavigisinnaagaa, tassa kommune attuumassuteqartoq ammappat, kommunilli ammasarfii sulisumut angerlatinneqartumut ajoqutaassanngitsut. Taamaattumik sulisoq angerlartinneqartoq ullormmit angerlartinneqarfimmiit aallanersumik suliffissaaruttunut ikissiissutinik pisinnaatitaavoq.

Aalisarnermut, Piniarnermut Nunanelrinermillu Naalakkersuisoqarfik siunnersuummut oqaaseqaateqanngilaq.

Siunnersuutip aalajangersagaanut ataasiakkaanut oqaaseqaatit

§ 1-imut

Aalajangersakkap pisut pingasut nassuiaatigai, inuk ”nammineq pisuussutigalugu suliffeeruttut” qanoq isigineqarnersoq. Tamanna atuuppoq, , inuk naammaginatumik tunngavissaqarnani suliffimminit soraarpat imaluunniit suliffini qimappagu imaluunniit nammineq inuttut atukkani peqqutigalugit soraarsitaappat.

”Inuttut nammineq atukkat” qaqugukkut pineqarnersut erseqqinnerusumik eqqartorneqarput. ”Inuttut nammineq atukkat” assersuutigalugu tassaasinnaapput suliffiup nalaani aalakoorneq imaluunniit naalakkiissutinik akuersaannginneq. Inuk nammineq pisuussutigalugu suliffeeruttut isigineqarsinnaavoq, pineqartup aapparmi suliffia peqqutigalugu inoqutimi nuunneri peqqutigalugit suliffimminit soraarpat. Tassunga taarsiullugu pineqartoq pisortat ikiorsiissutaat pillugit peqqussut malillugu ikiorsiissutinik pisartagaqarnissaminut pisinnaatitaassaaq. ”Naammaginatumik peqquteqarluni” assersuutigalugu tassaasinnaavoq, inuup qitornami annertuumik nappaateqarnera peqqutigalugu paarissallugu suliffimminit soraarpat. Inuk nammineerluni suliffimminit soraarsimappat, suliffimmi sulinikkut avatangiisit pissutigalugit, soorlu sulinikkut pissutsit sianiutinut tunngatillugu suliffimmi avatigiisitigut pissutsit ajortut, soorlu qinngasaarisarnermik, imaluunniit sulliviup illutaasa oqoqarnera pissutigalugit. Taassuma kingorna eqqartuussutikkut imaluunniit pineqartup suliffimini kattuffiata sulisitsisullu akornanni isumaqatigiinniareernikkut pineqartoq naammaginatumik peqquteqarluni soraarsimasoq isumaqatigineqarpat, kingumoortumik atuuttumik suliffeerunnermi ikiorsiissutinik tunineqarsinnaassaaq. Suliffeeruttup atugai ataatsimut isigalugit nalilersoreerlugit qinnuteqartoq nammineq pisuussutigalugu suliffeerussimanersoq kommunalbestyrelsip aalajangissavaa.

Kommunalbestyrelsip aalajangernera Isumginninnermi Maalaaruteqartarfimmut maalaarutigineqarsinnaavoq, tak. § 197. Aalajangernerup tigueqarneranit kingusinnerpaamik sapaatit akunneri sisamat (4) qaangiutinnginnerini Isumaginninnermi Maalaaruteqartarfimmut maalaarut tunniunneqartussaavoq.

§ 2-mut

Inuup sulinermik inuussutissarsiortutut akissarsiortoq nassuiaatigaa nakunaaquttap akunneranut, sapaatit akunnerannut, ullut 14-ikkaarkugit qaammammut imaluunniit akkord-erluni akissarsiortoq. Sulisitsisup akissarsiat akileraartussaataasutut nalunaarutigissavai. Tassani pingaaruteqartutut apeqqutaanngilaq, sulineq kommuneqarfimmi sammisassaqaartitsinikkut pilersaarummi sulinersoq, piffissatigut killeqartumik

atorfeqarnersoq imaluunniit piginnaangorsaannermi pilersaarutip ilaatut akissarsiatigut tapiiffigineqarluni sulinerunersoq. Suliffeqanngitsoq taamattaaq § 6, imm. 3-mi suliffeqarnissamut piumasaaqatit tungaannut nalunaaquttap akunnerini katersissaaq, soorlu pikkorissarnerni peqataanermigut, pikkorissarnerup nalaani ajunngitsorsiassaqaqtinnermigut, imaluunniit pikkorissarnerup nalaani akissarsiaqaqtitaanikkut.

Namminersortutut inuussutissarsiuteqartut sulinermik inuussutissarsiuteqartutut isigineqarsinnaanngillat. Piniartut, namminersorlutik aalisartut, savaatillit assigisaallu taamaalillutik sulinermik inuussutissarsiortutut oqariaatsip avataaniipput. Sulinermik inuussutissarsiortutut oqariaatsit aamma avataaniipput sinniisit ilaat, suliffissartik namminneerlutik pilersaarusiortaraat, isiginnaartitsisartut/eqqumiitsuliortut, nipilersortartut assigisaallu, taakku ataasiartumik ssuliaqarnerminnut akissarsiaqaqtinneqartartut, kiisalu oqalutsit namminersortut, siunnertortit assigisaallu namminneq atitik atorlugit suliaminnik ingerlataqartut.

§ 3-mut

Sulinermik inuussutissarsiorsinnaasut maani nassuiaateqarfigaat inuk peqqissutsimigut killilersorneqanngitsumik suliffik innersuunneqartoq suliffigilersinnaagaat imaluunniit piginnaangorsaannermi neqeroorummi peqataasinnaasoq, inuk taanna suliffissaqaqtitsiniarnermi sulileriaannaasutut isigineqassammat. Inuup suliassat takkussuuttut suulluunniit suliffigisinnaassavai, imaluunniit piginnaangorsaannermut neqeroorutit peqataaffigisinnaallugit. Tassanili § 9, imm. 3, nr. 1 malillugu atuutinngilaq, peqqissutsikkut atukkat eqqarsaatigalugit attuumassuteqartut.

§ 4-mut

Tunisassiornermik unitsitsineq annikitsumik nassuiarniarneqarpoq, sulisitsisummi sapinngisaminnik tunisassiornerup ingerlaavartumik ingerlanissaata qulakkeernissaa akisussaaffigimmassuk. Naammaginangitsumik pilersaarusiortoqarsimanera imaluunniit ataqaatigiissaarisqaqarnera peqqutigalugit pisortat amerlanerusunik aningaasartuuteqarnissaannik kinguneqartussaasut taamaalilluni siunertarineqanngilaq. Soorunami sulisitsisup tunisassiornerup ingerlaannarnissaa soqutigisaraa. Suliffissuarmimi sulisartut kisimik suliffeerunnermi ikiorsiissutinik pissarsisussaannngillat, aammali assersuutigalugu eqqiaasut kiffartuussinermilu sulisut allat suliffeqarfiup tunisassiassaaleqineq, maskiinanik ajutoornerit, silarlunnera pissutsillu assingusut siumut ilisimariikkat peqqutigalugit tunisassiornermik unitsitsisigallarsimanera peqqutigalugu eqqugaasussaammata. Inatsisartut inatsisaa nunami tunisassiornerinnaat ilaatinneqarnerinut killilerneqarpoq.

§ 5-imut

Suliffeerunnermi ikiorsiissutit suliffeeruttumut imaluunniit angerlartitaasumut sulinermi iluanaarutissaraluarni annaasaqarnermi taarsiissutitut tunniunneqartarput.

Aalajangersakkamut aammattaq ilaatinneqarput inuit suliffeqartut napparsimanertik peqputigalugu sulisinnaajunnaarallartut.

§ 6-imut

Imm. 1-imut

Suliffeerunnermi ikiorsiissutinik pissarsissagaanni piumasaqaataavoq suliffeeruttoq, angerlartitaasoq imaluunniit napparsimasoq, sulinermik inuussutissarsarsiorsinnaasoq imaluunniit piffissap ilaani napparsimanermik eqqorneqartoq, takukkit kapitali 3 aamma 4, suliffeeruttoq, angerlartitaasoq imaluunniit napparsimasoq suliffissaqartitsinermi suliffeqalersinnaasoq, 18-inik ukioqalereersimasoq imaluunniit pilersuisoq, Kalaallit Nunaanni kommunimi inuit allattorsimaffianni nalunaarsorsimasoq, sapaatillu akunnerini kingullerni 13-imi suliffeqarsimasoq, kiisalu piffissami tassani ikinnerpaamik nalunaaquttap akunnerini 182-inik suliffeqarsimasoq. Taassuma assigaa sapaatit akunnerisa 13-init ingerlanerini sapaatit akunnerannut ikinnerpaamik nalunaaquttap akunnerini 14-ini agguaqatigiissillugu sulisarsimasoq. Inuk ulluni 120-nik napparsimasutut nalunaarsorsimasoq kingornalu soraarsitaasoq sapaatit akunnerini kingullerni 13-ini suliffeqarsimasutut piumasaqaatit eqquutsissinnaavai. Inuk sapaatit akunneri kingulliit 13-it ingerlaneranni sulinnigiffeqarsimalluni feriarnersiutissanik katersineqarsimalluni, nalunaaquttap akunneri suliffeqarsinnaanermut piumasaqaatit eqquutsinnissaannut ilanngullugit naatsorsuutaassapput. Suliffeerunnermi ikiorsiittunik pissarsinissamut piumasaqaatit piffissami inuup suliffeerunnermi ikiorsiissutinik pissarsinissaminut qinnuteqarfigisaata nalaanik eqquutsinneqarsimassapput.

Sulilersinnaanermut oqariaaseq, tak. § 9, imm. 3, nr. 1, tamatumunnga atatillugu ima paasineqassaaq, suliffeerussimasoq kommunalbestyrelsip qaqugukkulluunniit sulilersinnaagaa.

Imm. 2-mut

Inuit tunisassiornerup unitsinneqarnera peqputigalugu angerlartitaasimasut, suliffissaqartitsiniarnermilu sulilersinnaasut imaluunniit piginnaangorsarnernut peqataasinnaasut, suliffeerunnermi ikiorsiissutinik pissarsisinnaatitaapput, ulloq kommunalbestyrelsimut saaffiginninneq aallaavigalugu, tamatumalu saniatigut imm. 1-imi aalajangersakkat eqquutsissimagunigit. Angerlartinneqarsimasoq ullormi angerlartinneqarfigisamini kommunalbestyrelsimut saaffiginnippat, angerlartinneqarsimsoq suliffeerunnermi ikiorsiissutinik pissarsisinnaassaaq, ullormi tassani sulisitsisumit

akissarsiaqartinneqarsimannginnermini. Inatsisatut inatsisaanni § 9, imm. 2-mi sapaatit akunneri 13-it piffissaliussaasut eqqarsaatigalugit, ullormi angerlartitaaffigineqartumi nalunaaquttap akunneri taamaallaat ullormi siullermi suliffeerunnermi ikiorsiissutinik pissarsiariffigissavai. Taamaalilluni angerlartitaasoq ullormi angerlartinneqarfigisamini aningaasatigut annaasaqassanngilaq suliffeerunnermi ikiorsiissutit pissarsiarinerisigut, pineqartoq sapaatit akunnerini 13-ini suliffeerunnermi ikiorsiissutinik suli pissarsisinnaammat.

Suliffissaaruttoq najukkamini kommunip allaffiata matoqqanerata nalaani angerlartinneqarpat, kiisalu suliffissaaruttup aqaguani kommunip allaffia ammarnerani kommune attavigisuniuk suliffissaaruttoq piffissamiit angerlartinneqarfimmit suliffissaaruttunut ikiorsiissutinik pissarsisinnaalissaaq. Taamaalilluni kommunip allaffiata ammasarfii suliffissaaruttumut ajoqutaassanngillat.

Sulisartut angerlartinneqarsimasut soraarsitaanngillat, taamaalillunilu atorfeqartutut atugaqartuulllutik, suliffissaqartitsiniarnermilu sulisinnaassuseqarlutik, piffissami angerlartinneqarfigisami akissarsiaqartinneqanngikkunik. Taamaammat angerlartinneqarsimsut suliffimmut innersuunneqarsinnaapput, taamaattorli eqqumaffigissavaat suliffimmik ataavartumik innersuunneqarnerminni suliffimminiit soraarsitaasinnaagamik.

Tamanna ajornartorsiutinik annertuunik kinguneqassasoq naatsorsuutigineqanngilaq, piffissaq soraarsitaaffiusussaq siumut sivikitsuarsuarmik kalerriinikkut pisarmat, ilinniarsimanngitsunut ullut 1 – 3-t ingerlanerini kalerriineqartarluni. Suliffeerunnermi ikiorsiissutit pillugit inatsisissap sularineqarnerani aalajangersagaq taanna SIK-mik aamma GA-mik oqaloqatigiissutigineqarsimavoq.

Angerlartitsisimaneq pillugu sulisitsisup allakkatigut kommunalbestyrelsimut uppenarsassavaa. Allakkatigut uppenarsaat elektroniskisumik tunniunneqarsinnaavoq. Angerlartitaasimasut suliffeerunnermi ikiorsiissutinik pissarsitinneqarnissaat sulisitsisup soqutigisarissavaa, taamaammallu angerlartitsisimaneq pillugu sulisitsisumut uppenarsaateqartinnissaa pillugu ajornartorsiutinik pilertoqarnissaa naatsorsuutigineqanngilaq.

Erseqqissaatigineqassaaq aaqqiissut angerlartitaasunut tunisassiorderup unitsinneqarnera pequtigalugu angerlartitaanermut atatillugu akissarsiaqartitaasut imaluunniit allatigut isertitaqartunut atuutinngimmat. Oqariaatsimut ilaapput anerlartitaasut pikkorissarnerni ajunngitsorsiassanik isertitaqarsimappata, suliffissaqartitsiniarnermi illuatungeriit angerlartitaasimasut piffissami angerlartitaaffiusimasumi pikkorissarnernut peqataanissaat isumaqatigiissutigisimappassuk. Isumaqatigiissutit tamakku ilaatigut sanaartorerup iluani kiisalu aalisarnermik kiffartuussinermillu sammisaqarnerup iluini sulisut ilaannut, soorlu isumaqatigiissutit atorneqartartut. Taamaalilluni angerlartitaasimasut sulisitsisumit allatut

akissarsiaqartitaasut imaluunniit allatut isertitaqartitaqartitaasut suliffeerunnermi ikiorsiissutinik pissarsitinneqarnissaannut Inatsisartut inatsisaata pisartagaqarnissaannik pinngitsoortittussaavai.

Inuit suliffeerunnermi ikiorsiissutinik pisartagaqartut namminneq pisuussutigiginagu suliffeerunnerminni imaluunniit inuussutissarsiummut allamut ikaarsaariarnerminni piginnaangorsarneqarnernut peqataanissaminnut pisussaaffeqarput. Piginnaangorsarneqarnerit tassaasinnaapput pikkorissarnerit imaluunniit sivikitsumik ilinniartitaaneq, tamakkununga ilaallutik pikkorissarnerit immikkoortitaartut iluarsanneqarsimasut.

Imm. 3-mut

Sulisitsisoq piaaraluni imaluunnit annertuumik mianersuaalliorluni paasissutissanik kukkusunik kommunalbestyrelsimut nalunaaruteqarsimappat, suliffeerunnermi ikiorsiissutit tunniunneqarsimasut sulisitsisumit utertinneqarnissaat piumasarineqarsinnaapput.

Imm. 4-mut

Sulisartog assersuutigalugu atorfeqarnermini pequtaasut piffissami angerlartinneqarfisamini akissarsoruni suliartog suliffeerunnermi ikiorsiissutinik pissarsisinnaangilaq.

Imm. 5-imut

Aalajangersakkami imm.1 malillugu qinnuteqartup piumasaqaatit eqquutsinnerai pillugit aalajangiineq, kommunip inunnik tooqqaaneq aqqutigalugu suliffeerussimasup kommunimut saaffiginninnerata kinguninngua pissaaq.

Imm. 1-imi piumasaqaatit qinnuteqartup eqquutsinnerai pillugit kommunalbestyrelsip aalajangiinera, inatsisip § 19-iat malillugu aalajangiinerup kingorna kingusinnerpaamik sapaatit akunneri sisamat (4) qaangiunnerini Isumaginninnermi Maalaaruteqartarfimmu maalaarutigineqarsinnaavoq, taannalu tiguneqareerpoq .

§ 7-imut

Aalajangersakkami erseqqissaatigineqarpoq inuit taamaallaat sulinermik inuussutissarsiorsinnaasut imaluunniit napparsimasut pisortanillu ikiorsiissutinik allatut pissarsiaqanngit, soorlu ilinniarnersiuteqartut, piginnaangorsaanermi ikiorsiissuteqartut imaluunniit nikerartunik suliffeqarlutik akissarsiallit, taamaallaat suliffeerunnermi ikiorsiissutinik pissarsisinnaatitaasut. Pisortanit ikiorsiissutit allat pillugit eqqarsaatigineqarput ikiorsiissutit isertitanut allanut taarriullugit tunniunneqartartut.

§ 8-mut

Imm. 1-imut

Suliffeeruttut angerlartitaasullu kommunalbestyrelsimut saaffiginnittut, kommunimut saaffiginninnerini siullermi ilitsersorneqarnissaminnik pisinnaatitaapput.

Imm. 2-mut

Suliffeerussimasoq imaluunniit angerlartitaasimasoq immikkut ittumik iliuusissatut pilersaarutip suliarineqarnerani peqataassapput, siunnersuutip siunertarimmagu suliffeeruttoq imminut pilersornissaminut akisussaalissammat, ilatsiinnartumik pilersuutinik pissarsiornermut taarsiullugu. Tassanili angerlartitaasunut immikkut ilanngunneqanngillit, § 8, imm. 4 malillugu immikkut iliuusissatut pilersaarummik suliarinninnissamut piunasaqaatinut aammattaaq ilanngunneqanngimmata.

Tassani ilaatigut qulakkeerniarneqarpoq, inuk sulinermik inuussutissarsiorsinnaassasoq suliffissaqartitsiniarnermilu suleriaannaasussaalluni. Kommunimut saaffiginnittut tungaannut suliniutit tullerriaarnissaat kommunalbestyrelsip akisussaaffigaa. Suliffeerussimasup imaluunniit angerlartitaasimasup saaffiginninnerata kingorna sapinngisamik pisaarnerpaamik immikkut ittumik iliuusissatut pilersaarutip suliarineqarnissaa kommunalbestyrelsip isumagitissavaa.

Atuutsitsilernissap nalaani ulapinnerup nalaani aporfissatigut ajornartorsiuteqartoqalernissaa naatsorsuutigineqarpoq, ullumikkut suliffissaaleqisutut nalunaarsorneqarsimasut tamarmik maanna immikkut ittumik iliuusissatut pilersaarummik suliarinniffigineqalertussaammata. Taamaattorli kingusinnerusukku naatsorsuutigineqarpoq suliffeerussimasup saaffiginninnerata kinguninngua iliuusissatut pilersaarut suliarineqarsinnaassasoq, inatsisip atuutileranani suliffeerussimasutut nalunaarsorsimasunit qangamut naleqqiullugu ingerlaavartumik saaffiginnittoqalertussaammat.

Suliffeerussimasoq imaluunniit angerlartitaasimasoq immikkut ittumik iliuusissatut pilersaarummik suliarinninnermi peqataanngippat, § 13, imm. 1, nr. 1 malillugu kommunalbestyrelse aalajangersinnaavoq sapaatit akunnerini sisamani (4) pillaatitut pisartagaqannginnissaa pillugu aalajangiisinnaatitaavoq.

Imm. 3-mut

Iliuusissatut pilersaarummi siunertat makku eqqarsaatiginiarneqassapput: Suliffeerussimasoq makkuninnga neqeroorfigineqassasoq; ilitsersorneqarneq, pisariaqartitsineqarpat piginnaangorsarneqarneq, sammisassaqartitsineq imaluunniit suliffimmik innersuunneqarneq.

Immikkut ittumik iliuusissatut pileraarutip suliarineqarnissaa pillugu malittarisassanit angerlartitaasimasut eqqarsaatigalugit pinngitsoortitsineqassaaq. Tassani pisut eqqarsaarigineqartut tassaapput angerlartitaaneq sivikitsuinnaasussatut isumaqarfigineqassammat, taamaalilluni piffissaq eqqarsaatigalugu immikkut ittumik iliuusissatut pilersaarut eqqarsaatigalugu suliniutit naammassinissaat periarfissaqassanngimmat. Taamaalilluni immikkut ittumik iliuusissatut pileraarummik suliarinninnermut atatillugu aningaasartuutissat tulluannngitsutut isumaqarfigineqarmata, siumut isigisumik paasinartussaammat, immikkut ittumik iliuusissatut pilersaarutip aallartinneqarnissaa angumerineqarsinnaanngimmat.

Imm. 4-mut

Angerlartitaaneq sivisunerpaamik ulluni 14-ini sivisussuseqassappat angerlartitaasoq iliuusissatut pilersaarummik suliarinniffigineqassanngilaq, tassami kommunalbestyrelsi angerlartitaasup iliuusissatut pilersaarummik suliaqartussaanngilag, tassa angerlartinneqarnerata sivisussusissaa annerpaamik sivisussuseqassasoq naatsorsuutigineqarpat. Ullulli 14-it ingerlareerpata angerlartitaasimasoq suliffeqanngitsut allat suliffeerunnermi ikiorsiissutinik pissarsisartut ilutigalugit immikkut ittumik iliuusissatut pilersaarummik suliarinniffigineqassapput.

Imm. 5-imut

Immikkut ittumik pilersaarutip suliffeerussimasoq imaluunniit angerlartitaasimasoq inatsisit allat malillugu ikiorsiissutinut allanut ikaarsaarpat malinnaaffigissavaa, taakkunani immikkut ittumik iliuusissatut pilersaarummik suliarinninnissamut piumasaqaateqartoqarmat. Tassani eqqarsaatigineqarput pisortat ikiorsiissutaat pillugit inatsisartut peqqussutaat malillugu ikiorsiissutit. Suliffeerussimasoq imaluunniit angerlartitaasimasoq piginnaanngorsaaneq pillugu peqqussut malillugu ikiorsiissutinut allanut ikaarsaarpat, pineqartup piginnaanngorsaanermit pilersaarutaa immikkut ittumik iliuusissatut pileraarut suliarineqareersimasoq aallaavigissavaa. Taamaalilluni kommunip isumagissvaa immikkut ittumik iliuusissatut pilersaarutip suliffeerussimasumut malinnaassasoq, taamaalilluni suliffeerussimasunut immikkut ittumik iliuusissatut pilersaarutip suliarineqareersimasup suliarineqaqqinnissaa piffissatigut kiisalu sulisutigut aningaasaqarnikkullu maangaannartitsisoqassanngimmat.

Imm. 6-imut

Iliuusissatut pilersaarut pisariaqartitsineq malillugu nutarterneqartarlunilu nalilersorneqartassaaq. "Pisariaqartitsineq malillugu" tassa isumaqarpoq, suliffeerussimasup atugaani pissutsit iliuusissatut pilersaarummut aalajangerneqarsimasumut sunnuteqarsinnaasut allannguuteqarpata iliuusissatut pilersaarut nutarterneqassaaq nalilersorneqarlunilu.

Imm. 7-imut

Immikkut ittumik iliuusissatut pilersaarut qanoq suliarineqassanersoq pillugu Naalakkersuisut malittarisassanik erseqqinnerusunik aalajangersaasinnaapput. Nalunaarutip siunertaraa iliuusissatut pilersaarutip suliarineqarnera kommunini assigiimmik suliarineqartarnissaa.

§ 9-mut

Imm. 1-imut

Suliffeeruttoq imaluunniit angerlartitaasoq suliffeerunnerup imaluunniit angerlartitaanerup atuutilernerata kingorna ullormit saaffiginniffiusumit siullermit suliffeeruttoq imaluunniit angerlartitaasoq suliffeerunnermi ikiorsiissutinik pissarsitinneqarnissaminut pisinnaatitaavoq. Suliffeeruttoq imaluunniit angerlartitaasoq suliffeerunnerup ulluata siulliani imaluunniit angerlartitaanerup ulluani kommunalbestyrelsimut saaffiginninngippat, piffissap suliffeerunnerup ulluata siulliani imaluunniit angerlartitaanerup ulluani aamma ullormi saaffiginniffiusumi piffissat akornanni pisoqalersinnaavoq, suliffeeruttoq imaluunniit angerlartitaasoq suliffeerunnermi ikiorsiissutinik pissarsitinneqarnissaminut piginnaatitaaffeqassanngitsoq.

Imm. 2-mut

Suliffeerunnermi ikiorsiissutit naatsorsorneqartarnerat akit malillugit ikiorsiissutit pillugu peqqussutaasimasup § 4-nik ingerlatitseqqinneruvoq. Erseqqinnerusumik naatsorsuisarneq pillugu § 14-ianut oqaaseqaatini allassimavoq. Suliffeerunnermi ikiorsiissutit sivisunerpaamik katillugit sapaatit akunnerini 13-ini tunniunneqarsinnaapput. Angerlartitaasoq ullormi angerlartinneqarfiusumi kommunalbestyrelsimut saaffiginnippat, sapaatit akunnerinik 13-inik piffissaliussamut atatillugu ullormi angerlartitaaffiusumi nalunaaruttat akunneri taamaallaat ilanngunneqarsinnaapput, pineqartup suliffeerunnermi ikiorsiissutinik pissarsiffissaani. Taamaalilluni angerlartitaasoq ullormi angerlartinneqarfigisamini suliffeerunnermi ikiorsiissutinik pissarsiassaminik aningaasatigut annaasaqassaaq.

Imm. 3-mut

Suliffeerunnermi ikiorsiissutinik pissarsisinaanermut piunasaqaataavoq, suliffeequttoq imaluunniit angerlartitaasoq suliffissaqartitsiniarnermi suleriaannaasusaaq, suliffeerussimanninnerlu nammineq pisussutigineqarsimannngitsoq.

Tamatumani sulilersinnaanermut piareersimaneq pillugu oqariaaseq ima paasineqassaaq, kommunalbestyrelsip suliffeerussimasoq imaluunniit angerlartitaasimasoq qaqugukkulluunniit sulilersissinnaagaat. Tassani aallaavik tassaavoq, suliffeerussimasoq imaluunniit angerlartitaasoq suliffissat takkuttut innersuussutaasuut suulluunniit sulilerfigisinnaasaat, taamaattorli inuit sulisinnaassuserminnik killeqartitaasutut nakorsamit

uppernarsaaserneqarsimasut suliffiit ilaannut nappaataannik ajornerulersitsisinnaasunut innersuunneqarsinnaanngillat.

Nammineq pisuussutigalugu suliffeerunneq ilaatigut ima paasineqassaaq, inuk naammaginatartumik peqqutissaqarnani suliffimminit soraarpat imaluunniit qimaguppat, imaluunniit atorfeqarnermini atugassarititaasut atornerlussimallugit nammineq pisuussutigalugu soraarsitaasimasoq. § 1-imut oqaaseqaatit innersuussutigineqarput.

Taamaalilluni nammineq pisuussutigalugu suliffeerunneq suliffeerunnermi ikiorsiissutinik pissarsinissamut pisussaaffeqartitaanngilaq.

Sulinngiffeqarnerup nalaani inuk suliffissaqartitsiniarnermi sulileriaannartut isigineqanngilaq, taamaammallu suliffeerunnermi ikiorsiissutinik tunniussisoqarsinnaanani. Tamannattaq assingusumik atuuppoq suliumajunnaarnermi aamma suliffinnik mattussinermi.

Imm. 4-mut

Aalajangersagaq taanna nutaajusoq Inatsisartut peqqussutaat atuuttumi nutaajuvoq.

Aalajangersagaq pisortat ikiorsiissutaat pillugit inatsisartut peqqussutaannit nr. 15, 20. november 2006-imeersup § 14-ianit isumassarsiaavoq. Aalajangersakkami siunertaavoq suliffeerunnermi ikiorsiissutinik pisartagallit paarlattaasutut suliffinni kommunip innersuussutaanni sulilersinnaanerat, taamaalilluni suliffeerunnermi ikiorsiissutit sivikitsumik suliffeqarsimanninnermi suliffeerunnermi ikiorsiissutinik pissarsinissaminut annaasaqassanngimmat.

Aalajangersakkap kingunerissavaa, suliffeerunnermi ikiorsiissutinik pissarsisartooq piffissami suliffeerunnermi ikiorsiissutinik pissarsisarnermi nalaani ulluni ataasiakkaani sulilersinnaammat taamaalillunilu akissarsiaqartitaassalluni. Ulluni akissarsiatigut isertitaqarfiusuni suliffeerunnermi ikiorsiissutinik pissarsiarisartakkat ikilisinneqassanngillat, kisiannili sulisimanerup kingorna suliffeerunnermi ikiorsiissutinik pissarsisarneq aannaaneqartussaani.

Naatsorsuutigineqarpoq aalajangersakkap kingunerissagaa, ulluni marlussunni paarlattaasutut sulilersinnaaneq ajornaannerulissasoq suliffnillu kommunip innersuussutigisaannik sulilersinnaanermut kaammattuutit annertunerulissallutik. Taamaalilluni ullut ataasiakkaat uullut tallimat (5) angusinnaavaat.

Imm. 5-imut

Sulilersinnaanermut pisussaaffik nalunaarusiatigut maleruagassanik erseqqinnerusunik Naalakkersuisut aalajangersaasinnaapput. Nalunaarutini maleruagassat aalajangerneqassapput

piumasaqaatit suut eqquutsinneqassanersut, suliffeerussimasut suut suliffigilersinnaagaat kiisalu sulilersinnaannginnermi kingunerisassat sunniutissallu suut kingunerisinnaagaat.

§ 10-mut

Imm. 1-imut

Napparsimanerup nalaani suliffeerunnermi ikiorsiissunik pissarsisinnaassagaanni inuup nammineq suliffissaqartitsiniarnermi suleriaannangikkallaruni kommunalbestyrelse ilisimatissavaa. Ilisimatitsineq oqarasuaatikkut imaluunniit nammineerluni saaffiginninnikkut pisinnaavoq. Pineqartup nakorsamit uppersarsaasernikkut napparsimanini uppersarsarsinnaassavaa. ”Suleriaannaanngikkallarneq” tassaavoq napparsimaneq tassaasariaqarmat ataavartumik innarluuteqalersimannginneq, taamaalilluni inuk suliffissaqartitsiniarnermi sulilersinnaasutut piareersimassalluni. Napparsimaneq pillugu aalajangersagaq suliffeerussimasunut, angerlartitaasunut kiisalu sulinermik inuussutissarsiuteqarlutik akissarsiortunut atorfeqarnermik nalaanni napparsimalersimasut.

Suliffeerunnermisut atuuppoq piffissaq tassaasinnaavoq, suliffeerunnermi ikiorsiissutinik pissarsisinnaaneq sivisunerpaamik sapaatit akunnerini 13-*ini* sivisussuseqarsinnaavoq.

Imm. 2-mut

Suliffeerunnermi ikiorsiissutinik pissarsisinnaaneq pissaaq, saaffiginnittoq sapaatit akunnerini kingullerni 13-*ini* sulinermik inuussutissarsiortutut akissarsiaqarluni suliffeqareersimagaanni. Sapaatit akunnerini marlunni (2) sivikinnerusumik napparsimasimagaanni suliffeerunnermi ikorsiissutit aatsaat napparsimanerup ulluisa pingajuannit (3) aatsaat tunniunneqarsinnaapput. Aalajangersagaq taanna akit tunngavigalugit ikiorsiissutitut aaqqiinerup atuuttup nanginnerivaa, manna tikillugu isorinninnissamat peqquutissaqarsimanngimmat, ilutigitillugulu sivikitsumik napparsimanerumut atatillugu kommuni suliassaanik sipaaruteqartarsimammat. Suliffeerussimasut angerlartitaasimasullu suliffeerunnermi ikiorsiissutinik pisartagaqareersut kipineqanngitsumik suliffeerunnermi ikiorsiissutinik pisartagaqartuassapput. Taamaalilluni suliffeerussimasut angerlartitaasimasullu napparsimalerneq sioqqullugu suliffeerunnermi ikorsiissutinik pissarsisartut napparsimalernerup ulluisa siullianni aamma aappaanni suliffeerunnermi ikorsiissutinik pissarsisassapput. Suliffeqanngitsut angerlartitaasimasullu napparsimalerneq sioqqullugu suliffeerunnermi ikiorsiissutinik pisartagaqareersut, ullut napparsimanerup nalaani suliffeerunnermi ikorsiissutinik pisartagaqarfiusut sapaatit akunnerinut 13-*inut* ilanngunneqassapput, suliffeerussimasup imaluunniit angerlartitaasup suliffeerunnermi ikiorsiissutinik pissarsisinnaatitaanerata nalaaniittunut ilanngullugit.

Imm. 3-mut

Piffissami napparsimaffiusumi sapaatit akunnerini marlunni (2) sivilunerusuni suliffeerunnermi ikorsiissutin ik pisartagaqarneq ullup siullianit tunniunneqartassapput. Napparsimaneq sapaatit akunneri marluk sinnerlugit naatsorsuutigisamit sivilunerusussaasutut paasineqarpat kommuni nammineq piumassutsiminik suliffeerunnermi ikorsiissutinik ullut napparsimaffiusut siullianni aappaannilu tunniussissaat qulakkiissavaa.

Sapaatit akunnerat ulluni suliffiusuni nalinginnaasuni tallimatut naatsorsuunneqarpoq.

Napparsimaneq sulinermi ajoqusernermit peqquteqarpat suliffeerunnermi ikorsiissutit ullup napparsimaviusup siulliannit tunniunneqassapput. Ajoquserneq imaluunniit napparsimaneq sulinermit aallaaveqartuuppat imaluunniit attuumassuteqarnera nalilissagaanni Sulinermi ajoqusernermi sillimmasiinermt Ataatsimiititaliap ataaniittutut naatsorsuutigineqassaaq. Napparsimaneq sulinermi ajoqusersimanertut kingusinnerusukut paasineqarpat, suliffeerussimasorli napparsimanerup ulluata siullianni suliffeerunnermi ikorsiissutinik pissarsisimangippat, suliffeerunnermi ikorsiissutit kingumoortumik tunniunneqassapput. Sulinermi ajoqusernermt atatillugu suliffeerunnermi ikorsiissutit ulluini siullermi aamma aappaannilu kingumoortumik akilerneqassapput, nalilissagaanni Sulinermi ajoqusernermi sillimmasiinermt Ataatsimiititaliap sulinermi ajoqusernertuunersoq nalileqqaartussaammagu. Taamaammat sulinermi ajoquserneruppat pineqartoq aatsaat napparsimanerup ulluata pingajuanni tunniunneqassapput, soorlu suliffeerunnermi ikorsiissutinik pisartagalit napparsimannerminni nalaanni sulisinnaajunnaarallarnermik kinguneqarpat tunniunneqassapput.

nalilissagaanni Sulinermi ajoqusernermi sillimmasiinermt Ataatsimiititaliap sulinermi ajoquserneqarfiusutut nalilersimassappagu suliffeerunnermi ikorsiissutit ullup napparsimanerup siullianni aappaannilu pineqartoq akilerneqassaaq. Sulinermi ikorsiissutit tunniunneqarneri sulinermi ajoqusersimanermt uiggiullugit napparsimanerup nalaani tunniunneqarsinnaapput. Pineqartoq pilattartilluni nakorsarneqassappat, taannalu immaqa sulileqqereersimasooq pissappat, napparsimaneq pillugu malittarisassat malillugit suliffeerunnermi ikorsiissutinik tunineqarsinnaassaaq. Ima paasineqassaaq, suliffeerunnermi ikorsiissutit ullup napparsimaffiusup pingajuannit akilerneqassapput, pineqartoq sapaatit akunnerini kingullerni 13-ini nalunaaquttap akunnerini 182-ini sulisimaneranut piumasaqaatit eqquutsissimappagit. Innersuussutip taassuma ilanngunneqarneranut peqqutaavoq, inuit ilaat sulinerminni ajoqusersimanertik pequtigalugu pilattartillutik nakorsarneqartarnera sulinermi ajoqusernermik nalaanneqarnerup kinguningaatsiaa aatsaat pisarmat.

Tamatuma kingorna napparsimaneq sulinermi ajoqusersimanertut akuerineqarpat kingornalu taarsiiffigineqarnermik kinguneqarpat suliffeerunnermi ikorsiissutit tunniunneqarsimasut kingumoortumik akilerlugit utertinneqassapput, tak. § 16. Piffissaq napparsimaffiusooq pillugu

aalajangersagaq sulinermi ajoqusersimanerup pilersimaneranut uiggiunnera tassani pineqarpoq.

Suliffeerunnermi ikiorsiissutinik naatsorsueriaaseq § 14-imut oqaaseqaatini erseqqinnerusumik nassuiaatigieqarpoq.

Imm. 4-mut

Piffissaq napparsimaffiusoq qaangiuppat, pineqartorlu suliffissaqartitsiniarnermi sulisinnaassunngorpat, tamanna pillugu kommunalbestyrelse kalerrinneqassaaq. Pineqartoq napparsimajunnaarnini pillugu kommunalbestyrelsimut nalunaarutiginnippagu, pillaatitut tunniussisinnaanninneq pillugu aalajangersagaq innersuussutigalugu taama pillaaammik tunineqanngitsoornissaa atuutilissaaq.

Imm.5-imut

Aalajangersagaq nutaajuvoq aalajangersarlugulu, napparsimanerup nalaani suliffissaarunnermi ikiorsiissutinik katillugit sap. akunnerini 13-ini pissarsisoqarsinnaavoq, tak. § 9. imm.2. Sivisussuseq suliffissaruttumut napparsimasumut atuuppoq.

§ 11-imut

Aalajangersakkami ilaatigut eqqarsaatigineqarput suliffeerussimasut suliffimmik innersuunneqarsimasut, kingornalu piffissami sivikitsumi napparsimasutut nalunaarutigineqaruni.

Suliffeqanngitsoq sapaatit akunneri pingasut (3) sinnerlugit napparsimasutut nalunaarutigineqarsimappat imaluunniit sivikitsumik napparsimasimappat, taamaalillunilu ulluni ataasiakkaani napparsimasutut sulinngitsoorsimalluni, kommunalbestyrelsip misissussavaa suliffeerussimasoq ikiorsiissutinik allanik pisartagaqarnissaanut nuutsinneqassanersoq.

Ikiorsiissutitut allatut paasineqassapput piginnaanngorsarneqarnek, atuarteqqinneqarnek imaluunniit inatsisit tamakkununnga attuumassuteqartut malittarisassat allat malillugit pisortanit ikiorsiissutit allat.

§ 12-imut

Suliat ataasiakkaat aalajangersimasut nalilersoreernerisigut kommunalbestyrelse aalajangissaaq nakorsamit uppenarsaammik pissarsiortoqassanersoq. Suliffeerunnermi ikorsiissutinik pisartagaqartumit nakorsamit uppenarsaammik pissarsiffiginissaa kommunalbestyrelsip kissaatigigunilu kommunalbestyrelse taassuminnga pissarsinissaminut qinnuteqarnini akilissavaa.

Aalajangersagaq ilaatigut atorneqassaaq suliffeerussimasoq makkuninnga neqerooruteqarfiginermini itigartitsippat; suliffik innersuunneqarsimasoq akuerinngippagu imaluunniit sammisassaqtitsineq, suliffissaqtitsineq imaluunnuut napparsimanini peqqutigalugu piginnaangorsarneqarnermik neqeroorfigineqarneq. Taamaattoqartillugu pillaatitut aningaasanik tunniussinissaq sioqqullugu uppersaammik pissarsinissaq piumasarissallugu pissusissamisuussaaq, tak. inatsisip kapitaliata 5-iat.

Imm. 2-mut

Nakorsamit uppersaasersimanermut aningaasartuutit kommunalbestyrelsimit akilerneqassapput.

§ 13-imut

Imm. 1-imut

Pillaatitut tunniussinnginnissaq pillugu aalajangersagaq atuutilissaaq, suliffeqanngitsoq imaluunniit angerlartinneqarsimasoq immikkut ittumik iliuusissatut pilersaarummut peqataanissaminut itigartitsisimappat, suliffimmut innersuunneqartumut sulerusunngippat imaluunniit atorsinnaasumik peqquteqarnani suliffimmut innersuunneqarsimasumut takkussimanngippat.

Suliffissamut innersuutigineqartumut itigartitsinermit pequtaasutut atorsinnaasoq soorlu asser-suutigalugu tassaasinnaavoq suliffeqanngitsoq imaluunniit angerlartinneqarsimasoq napparsimanini pissutigalugu suliffissaq innersuutigineqartoq suliarisinnaanngippagu. Taama pisoqartillugu kommunalbestyrelsip suliffeqanngitsoq imaluunniit angerlartinneqarsimasoq napparsimamera nakorsap allagaatigut uppersaqaqullu piunarsaqarfigisinnavaa. Nakorsap allagaanut aningaasartuutit kommunalbestyrelsemit akilerneqassapput.

Suliffeqanngitsup imaluunniit angerlartinneqarsimasup suliffissamik innersuunneqartumik suliarinnissinnaannginnerminut peqqutigisinnasai tassaasinnaapput ilinniakkat tunngavigalugit piginnaasanik amigaateqarnini imaluunniit suliffimmut innersuunneqarsimasumut ingerlanissamut angallannikkut periarfissaqannginneq.

Kiisalu pillaatissinneqarsimaneq atuutilissaaq suliffeqanngitsoq imaluunniit angerlartinneqarsimasoq piginnaasanik qaffaassanissamik, aallartinnissamut suliffissaqarniarnissamullu neqeroorutinik, iliuuseqarnissamut pilersaarutitut suliarineqarsimasuni aalajangersarneqarsimasunik suliaqarnissamut atorsinnaasumik peqquteqarani itigartitsisimappat. Kiisalu pillaatissinneqarsimaneq atuutilissaaq suliffeqanngitsup imaluunniit angerlartinneqarsimasup napparsimanermi kingorna peqqissisimanini ingerlaannartumik nalunaarutiginnitsoorpagu.

Suliffeqanngitsoq imaluunniit angerlartinneqarsimasoq sapaatip akunnerini 13-imi suliffissaaruttut ikiorsiissutinik pissarsinissamut pisinnaatitaaffeqarpoq, tassa suliffissarsiortut nalunaarsorsimaguni. Pineqartorlu suliffissamut innersuunneqarsimasumut takkutinnikkuni sapaatip akunnerini 4-ni suliffissarsiortut ikiorsiissutinik tunineqarsinnaangilaq, Kisiannili suliffeqanngitsoq imaluunniit angerlartinneqarsimasoq katillugit sapaatip akunnerini 13-imi suliffissaaruttut ikiorsiissutinik pissarsinissamut pisinnaatitaaffeqarpoq.

Suliffeqanngitsup imaluunniit angerlartinneqarsimasup imminut tunngatillugu iliusissamut pilersaarutip sularineqarnera peqataaffinngikkuniuk imaluunniit sapaatip akunnerisa 4-t kingornatigut piginnaangorsaqinnissamut isumaqatigiissutaareersumut takkutinnigippat taava suliffeqanngitsoq imaluunniit angerlartinneqarsimasoq suliffissarsiortut isigineqarunnaassaaq, taamaattumillu sapaatip akunnerini 13-imi suliffissaaruttut ikiorsiissutinik pissarsinissamut pisinnaatitaaffeqarunnaarsinneqassaaq, taamaalillunilu suliffeqanngitsoq imaluunniit angerlartinneqarsimasoq isumaginnikkut allatut pineqalissalluni.

Imm. 2-mut

Suliffimmi suliassatut innersuunneqartup sularinissaanut atatillugu tamanna sioqqullugu suliffigisami atorfinitsinneqarsimanerup taamaatinneqartariarqarnissa pisariaqalersinnaasoq ilimagineqarpat tamanna inuiaqatigiinnut aningaasanullu tunngasut eqqarsaatigalugit nalilersorqaarlugit suliassap innersuutiginissaa kissaatiginarpoq.

Imm. 3-ut

Pillaatissinneqarnerup sivissussusaata suliffissaaruttut ikiorsiissutinik pissarsinissamut pisinnaatitaaffeqarnerata sivissussusaanik sivikillisisangilaq, imaannerussallunilu ikiorsiissutit pineqartumut kingusinnerusukkut tunniunneqartut.

Imm. 4-mut

Taamaallaallu pillaatissinneqarnerit ataasiakkaarlugit tunniunnesinnaallutik. Tamatumalu kingornatigut suliffissaaruttut ikiorsiissutinik pissarsinissamut pisinnaatitaaffeqarnera atorunnaartutut isigisariaqarpoq, tassami pineqartoq suliffissarsiorunnaartutut isigineqalissammat.

§ 14-imut

Imm. 1-imut

Suliffissaaruttut ikiorsiissutit akileraarusertussaapput kiisalu SIK Naalakkersuisullu akornanni ilinniagaqangitsut minnerpaamik akissarsiaattut isumaqatigiissutaasa 90%-iinik annertussuseqarlutik. Taamaalillutik suliffissaaruttut ikiorsiissutit ataasimik

annertussuseqarput, Tamatuma kinguneraa inuit pisinnaatitaaffeqartut tamarmik assigiimmik suliffissaaruttutut ikiorsiissutinik assigiinnik pissarsisinneqartarput, apeqqutaatinnagu qanoq pilersugassaqartigineq kiisalu siusinnerusukkut qanoq annertutigisunik aningaasarsiansimaneq.

Imm. 2-mut

Suliffissaaruttutut ikiorsiissutit sap. ak. 13-ini kingullerni aningaasarsiat allagartaani allaqqasut tunngavigalugit nal. ak. suliffiusimasut qanoq amerlatigisimaneri tunngavigalugit naatsorsorneqartarput. Nal.ak. suliffiusimasut 182-t ataassimappatigit suliffissaaruttoq suliffissaaruttutut ikiorsiissutinik pissarsisarunnartarput.

Nal. ak. suliffigisat katillugit 182-t kiisalu 520-t akornaniippata (sap.ak. 13-t á nal.ak. 40-t) sapaatip akunneranut nal. ak. amerlassusissaannut agguaqatigiisinneqassapput. Nak. ak. suliffigisimasat katinnerini nal. ak. 520-t qaangersimassagaluarpatigit sapaatip akunneranut nal. ak. suliffiusimasut 40-nut inissinneqarnerat tunngavigineqassaaq. Tassunga atatillugu oqaasigineqassaaq qaffasinnerpaatut atorneqarmat.

Suliffissaaruttutut ikiorsiissutit annertussisaata naatsorsornera sulifeqarnnginnerup nalaani ullormit saaffiginniffiusumiit naatsorsorneqartassaaq, naatsorsuinerlu suliffeqannginnermi tamarmi atorneqassaaq. Suliffissaaruttutut ikiorsiissutit annerpaamik sap. ak. 13-imi tynniuneqarsinnapput, tak. § 9 imm. 2 aamma § 10 imm. 4.

Suliffeqanngitsoq soorlu assersuutigalugu sap. ak. 13-ini kingullerni katillugit nal. ak. 195-ini sulisimaguni, taava pineqartoq taamaallaat nal. ak. 195-imik suliffissaaruttutut ikiorsiissutinik pissarsisinneqarsinnaavoq. Nal. ak. 195-t taakkua sap ak. 13-inut agguarneqassapput taakualu annerpaamik suliffissaaruttutut ikiorsiissutinik pissarsiarineqarsinnaallutik, taamalilluni pineqartoq piffissami suliffissaaruttutut ikiorsiissutinik pisartagaqarfisamini sap. ak. nalunaaquttap akunnerisa 15-t nalinginut suliffissaaruttutut ikiorsiissutinik tunineqartassalluni.

Suliffeqanngitsoq sapaatit akunnerisa 13-t iluanni sulinngiffeqarsimappat, taava ullut sulinngiffiit nalinginnaasumik ullutut suliffittut naatsorsorneqassapput.

Suliffeqanngitsoq ingerlaannartumik sapaatip akunneri marluk sinnerlugit suliffeqanngissimaguni, taava suliffeqanngitsoq ullut 14-ikkaarlugit suliffissaaruttutut ikiorsiissutinik pissarsisinneqarsinnaavoq. Suliffeqannginneq sapaatip akunnerinik marlunnik sivikinnerusimappat suliffissaaruttutut ikiorsiissutinik pissarsiassai ullormi nalinginnaasumik aningaasarsiffiusumi tunniunneqassapput.

Suliffissaaruttutut ikiorsiissutit suliffissaaruttup kontoanut ikinerisigut tunniunneqassaput.

Imm. 3-mut

Naalakkersuisut kiisalu SIK-p aningaasarsiatigut isumaqatigiissutaanni allannguisoqarpat allanngiineq sapiinngisamik piaarnerpaamik tamanut ammasumik tusarsiuqqassaaq.

Imm. 4-mut

Nal. ak. aningaasarsiap nuraap annertussusaa tamanut ammasumik tusarsliunneqarnerata kingorna ataasinngorneq siullermiit atuutilissaaq, taamaalilluni suliffissaaruttutut ikiorsiissutinik pissarsiarineqareersimasut iluarsiiisuteqarfigineqassanngillat.

Ukiuni aningaasarsiatigut nutaamik isumaqatigiinniarfiusuni nal. ak. aningaasarsiap annertussusissaa nutaaq aningaasarsiatigut isumaqatigiissutip atsiorneqarnerata kingorna aatsaat tamanut ammasumik nalunaarutigineqarsinnaavoq. Tamanna sioqqullugu suliffissaaruttutut ikiorsiissutit atuuttoq atorineqassaaq.

§ 15-imut

Imm. 1-imut

Inuk suliffissaaruttutut ikiorsiissutinik pisartagaqartoq aningaasaqarnerminut, inuttut inuunermilu atukkaminut tunngasunik suliffissaaruttutut ikiorsiissutinik pissarsinissamut pisinnaatitaaffeqartup ingerlaannarnissaa pillugu naliliinissamut pingaaruteqarmat kommunalbestyrelsimut ilisimatitissutigissallugit pisussaaffeqarpoq. Paasissutissanik tunniussinissamut pisussaaffik taamaallaat atuuppoq kommunalbestyrelsip inummut tunngatillugu paasissutissanik pigeriigaani allanngortoqarsimappat. Tamatumunnga atatillugu oqaatigineqassaaq paasissutissanik tunniussisussaanermut ilaammata taartisineq assigisaallu, taakkualu suliffeqanngitsup § 16 malillugu kommunalbestyrelsimut ilisimatitissutigisussaavai

Imm. 2-mut

Kiisalu kommunalbestyrelsip suliffissaaruttutut ikiorsiissutinik pissarsinissamut pisinnaatitaaffeqartup pisinnaatitaafiata ingerlaannarnissaanik unitsinneqanissaanilluunnit nalilersuinermit suliaqarnermut atatillugu paasissutissanik oqartussaaffiit allat aallerfigisinnaavai. Paasissutissanik pissarsinissamut piumasaqarnissamut periafissamut tunngavigineqarpoq tunngavissaqanngitsimik suliffissaaruttutut ikiorsiissutinik pissarsinissap pinaveersaarnissaa. Taamaattorli inatsisit tunngavigalugit paasissutissanik pissarsinissaq pisinnaanngitsullugu kommunakbestyrelsi paasissutissanik pissarsinissaanngilaq. Taamaattumillu paasissutissanik pissarsiniarnermi nipangiussisussaataaneq kiisalu nalunaarsuinermit maleruagassat assigisaallu eqqasaatigeqqaarneqassapput.

§ 16-imut

Suliffissaaruttut ikiorsiissutininik pissarsisartup piffissamut pissarsivigineqartumut tunngatillugu taarsiissutisigaluarpat pissarsiai utertinneqassapput, tassami pisimasup marloqiusamik ikiorsiissutigineqanissaa pisinnaangimmat. Utertitsinnaanissaq pisortanut akiitsoqalersitsinaveersaarnissap akiitsunillu akiliisitsisarneq pillugu Inatsisartut inatsisaat malillugu ingerlanneqassaaq.

Tamatumunnga atatillugu taarsiissutit tassaapput tiguisup sulinerminut atatillugu ajoquserneranut taarsiissutit imaaluunit inatsisit malillugit pinngitsooratik taarsiissutigineqartariaqartut.

Aalajangersagaq taamaattoq pisimasup kingornatigut napaat sulinermi ajoqusernertut nalilerneqarpat imaluunniit sulisartup suliunnarnerup kingornatigut akissarsiaqartinnerata ingerlanerata aalajangiiffigineqarneranik sivisunerusumik ingerlanerani atorneqarajuttarpoq.

Aalajangersagaq aammattaaq suliffeqarfiup akiliisinnaajunnaartutut inissinnerata kingornatigut sinnerutuusinnaasut aningaasarsisitsisinnaanerani.

§ 17-imut

Aalajangersakkap suliffissaaruttut ikiorsiissutininik pissarsianik kommunalbestyrelsip piunnaqarnissaa periarfissippaa, tassa taamatut pissarsisup Inatsisartut § 15-imi imm-1-imi piunnaqataagaluortoq passissutissanik tunniussaqaarsimanngippat.

Kiisalu kommunalbestyrelsip suliffissaaruttut ikiorsiissutininik pissarsianik utertitsinissaq piunnaqarsinnaavaa pissarsisarneq eqqunngitsumik tunngaveqartumik ingerlanneqarsimappat.

”Annertunerusumik ilisimasasaqaraluarluni” paasineqassaaq inuup paasissutissanik eqqunngitsunik amigaateqartunillu kommunalbestyrelsimut tunngiussaqaarsimanerani.

Kommunalbestyrelsip paasissutissat tunniunneqarsimasut eqqunngitsuussinnaasut ilimaguniuk taava kommunalbestyrelsip paasissutissat eqqortuunersut misissussavai.

§ 18-imut

Imm. 1-imut

Kommunalbestyrelsit ataasikkaat tassaapput suliffissaaruttut ikiorsiissutinut aningaasartuutininik akiliisussat. Taakkua aningaasartaat kommunenut ataatsimoortumik tapissutit aqutugalugit tunniunneqartarput.

Imm. 2-mut

Kommuni najugaqarfigineqartoq tassaavoq inuit ataasiakkaat suliffissaaruttut ikiorsiis-sutaannik tunniussinissamut pisussaaffeqartut.

Suliffissaqanngitsoq imaluunnit angerlatinneqarsimasoq kommunemini iliuusissamut pilarsaarummik suliaqarfigineqarsimasoq suliffissaqarngitsoq imaluunnit angerlatinneqarsi-masoq kommunemut allamut nuussimappat, taava kommunip nuuffigisap kommuni tamanna sioqqullugu kommuni najugarisimasaa saaffigalugu taassumunnga iliuusissamut pilarsaa- rummik suliarisimasaanut tunngasut pissarsiariniassavai taavalu iliuusissatut pilersaarutip pisariaqarfiisigut tulluarnissaanik suliaqassalluni. Naleqqussaane pisinnaavoq kommunimi nuuffigisami pissutsit allat atuuttuunerisa kingunerisaannik iliuusissatut pilersaarutaata iluanni allunnguinnissaq pisariaqalersippassuk. Kommunip aallarfigisap tamakkununga tunngatisutigut kommunemit nuuffigisamiit tigusaqarniaruni nuuttup inuttut iliuusissatut pilersaarusiordfigineqarneranut tunngasut kommunemut nuuffigineqarsimasumut nassiutissavai.

Imm. 3-mut

Tamanna pissaaq nuuttup iliuusissatut pilersaarusiordfigineqarneranut tunngatillugu aningaasartuutissat annikillisinniarlugit, kiisalu suliffissaqarngitsup imaluunnit angerlatinneqarsimasup kommunenemi najugarilikkami iliuusissatut pilersaarusiunnera aallaqqaataaniit aallarteqqinnissaa pingitsoorniarlugu

§ 19-imut

Qinnuteqartup suliffissaaruttut ikiorsiissutinik pissarsiassanik pisinnaatitaanersoq, pillaatisiqartinneqassanersoq imaluunnit suliffissaaruttut ikiorsiissutinik pissarsianik utertissanersoq pillugit kommunalbestyrelsip aalajangigaata Isumaginninnermut Maalaartarfimmut maalaarutigineqarsinnaavoq.

Imm. 2-mut

Isumaginninnermut Maalaartarfimmut maalaarutinik tunniussinissaq kingusinnerpaamik kommunalbestyrelsip aalajangernerata tigungeraniit sap. ak. 4-t qaangisutsinnagit pissaaq.

§ 20-imut

Imm. 1-imut

Siunnersuutigineqassaaq inastsit ulloq 1. juli 2014 atuutilissasoq.

Imm. 2-mut

Inatsisip matuma atuutilerneratigut Inatsisartut peqqussutaat nr. 5 ulloq 1. juni 2006-imeersoq suliffissaaruttut ikiorsiissutitut tunngasoq atorunnaassaaq.